

**O'ZBEKISTON RESPUBLIKASI VAZIRLAR MAHKAMASINING
QARORI**

“MA’NAVIY HAYOT” JURNALI TAHRIRIYATINI TASHKIL QILISH TO‘G‘RISIDA

Milliy g‘oyamizning asosiy tushuncha va tamoyillarini, O‘zbekistonda barpo etilayotgan zamonaviy demokratik davlat va kuchli fuqarolik jamiyatining ma’naviy asoslarini chuqur o‘rganish va keng targ‘ib etish maqsadida Milliy g‘oya va mafkura ilmiy-amaliy markazining jurnalni sifatida tashkil etilgan “Ma’naviy hayot” jurnalini nashr qilish ishlarini takomillashtirish maqsadida Vazirlar Mahkamasi qaror qiladi:

1. Respublika “Ma’naviyat va ma’rifat” kengashi, Milliy g‘oya va mafkura ilmiy-amaliy markazi va O‘zbekiston matbuot va axborot agentligining Milliy g‘oya va mafkura ilmiy-amaliy markazi muassisligida yuridik shaxs maqomiga ega bo‘lgan “Ma’naviy hayot” jurnalni tahririyatini tashkil etish to‘g‘risidagi taklifi ma’qullansin.

2. “Ma’naviy hayot” jurnalni tahririyatining asosiy vazifalari etib quyidagilar belgilansin:

Milliy g‘oya va mafkura ilmiy-amaliy markazi bilan kelishilgan mavzular rejasiga asosan jurnal uchun materiallar to‘plash, ular asosida ilmiy maqola va taxliliy materiallar tayyorlash, jurnalni har chorakda bir marta nashr etish va tarqatish;

xalqimizning boy tarixi va madaniy merosini, milliy g‘oyamizning asosiy tushuncha va tamoyillarini, O‘zbekistonda barpo etilayotgan zamonaviy demokratik davlat va fuqarolik jamiyatining ma’naviy asoslarini chuqur o‘rganish va keng targ‘ib etish;

jamiyatimizning mafkuraviy immunitetini kuchaytirishga qaratilgan samarali usul-uslublarga bag‘ishlangan ilmiy maqolalarni chop etish, milliy urf-odat, an’ana va qadriyatlarning hayotimizdagi o‘rni va ahamiyatini har tomonlama yoritib borish;

mamlakatimizda amalga oshirilayotgan davlat siyosatining ustuvor yo‘nalishlari, keng ko‘lamli islohotlarning mohiyati, qabul qilingan qonun hujjatlari va davlat dasturlarining ahamiyatini atroficha sharhlash va tushuntirish.

3. Milliy g‘oya va mafkura ilmiy-amaliy markazi:

o‘n besh kun muddatda “Ma’naviy hayot” jurnalni tahririyatini tashkil qilish va uning moddiy-texnika bazasini shakllantirish, jurnalning muntazam nashr qilinishini ta’minlash bo‘yicha kompleks chora-tadbirlar ishlab chiqilishini;

“Ma’naviy hayot” jurnalni tahririyatining nizomining ishlab chiqilishi va o‘rnatilgan tartibda davlat ro‘yxatidan o‘tkazilishini;

O‘zbekiston Respublikasi Mehnat va aholini ijtimoiy muhofaza qilish vazirligi va Moliya vazirligi bilan kelishilgan holda jurnal tahririyati xodimlari mehnatiga haq to‘lash bo‘yicha razryadlar va shtatlar jadvali tasdiqlanishini;

bir oy muddatda jurnalda chop etiladigan maqolalar uchun mualliflik haqi to‘lashni tartibga soluvchi tegishli me’yoriy-huquqiy hujjat ishlab chiqilishini;

jurnal tahririyati faoliyati uchun zarur shart-sharoitlar yaratilishini ta’minlasin.

4. “Ma’naviy hayot” jurnalni tahririyati bosh muharriri Milliy g‘oya va mafkura ilmiy-amaliy markazi rahbari tomonidan tayinlanishi va vazifasidan ozod etilishi belgilab qo‘yilsin.

5. “Ma’naviy hayot” jurnalni tahririyati Toshkent shahar, Mirobod tumani, Buyuk Turon ko‘chasi, 42-uy manzilida joylashgan O‘zbekiston Milliy axborot agentligi binosiga ijara to‘lovi undirilmasdan joylashtirilsin.

6. “Ma’naviy hayot” jurnalni tahririyatining pul mablag‘lari quyidagilar hisobiga shakllantirilishi inobatga olinsin:

jurnalni sotishdan tushadigan mablag‘lar;

yuridik va jismoniy shaxslarning xayriya ehsonlari, xorijiy va xalqaro tashkilotlar, xorijiy davlatlarning grantlari;

budget mablag‘lari (subsidiya);

qonun hujjatlarda taqiqlanmagan boshqa tushumlar.

7. Belgilab qo'yilsinki, budjet mablag'lari (subsidiya) "Ma'naviy hayot" jurnali tahririyatining o'z daromadlari bilan qoplanmagan saqlash xarajatlarining tegishli qismini moliyalashtirish uchun ajratiladi.

8. O'zbekiston Matbuot va axborot agentligi jurnalni muntazam ravishda imtiyozli narxlarda chop etish bo'yicha choralar ko'rsin.

9. O'zbekiston Respublikasi Axborot texnologiyalari va kommunikatsiyalarni rivojlantirish vazirligi:

"Ma'naviy hayot" jurnali tahririyatini xizmat telefonlari, jumladan, shahar telefoni, internet va boshqa aloqa vositalari bilan ta'minlasin;

jurnalni muntazam ravishda obunachilarga imtiyozli narxlarda yetkazilishi bo'yicha choralar ko'rsin;

jurnalning veb-saytini yaratishda ko'maklashsin.

10. O'zbekiston Respublikasi Moliya vazirligi:

"Ma'naviy hayot" jurnali tahririyatining asoslangan hisob-kitoblari bo'yicha uning o'z daromadlari bilan qoplanmagan xarajatlar qismini moliyalashtirish uchun mablag'larni (subsidiya) O'zbekiston Respublikasi Davlat budgetining "Madaniyat" sohasi uchun ko'zda tutilgan mablag'lar doirasida ajratsin;

"Ma'naviy hayot" jurnali tahririyatiga bitta xizmat yengil avtomobilini saqlash uchun limit ajratsin.

11. Mazkur qarorning bajarilishini nazorat qilish O'zbekiston Respublikasi Bosh vazirining o'rinosi A. Ikramov zimmasiga yuklatilsin.

O'zbekiston Respublikasining Bosh vaziri Sh. MIRZIYOYEV

Toshkent sh.,
2015-yil 29-may,
141-son

(O'zbekiston Respublikasi qonun hujjatlari to'plami, 2015-y., 21-son, 272-modda)